



Broj: 01,02,03,03/11-05-1-184/17
Sarajevo: 22. 5. 2017.

Izvještaj

Konferencija predsjednika parlamenata zemalja centralne i istočne Evrope Varšava, 17. i 18. maj 2017.

Predsjedavajući Predstavničkog doma Parlamentarne skupštine BiH Šefik Džaferović i predsjedavajući Doma naroda Parlamentarne skupštine BiH Bariša Čolak učestvovali su u radu Konferencije predsjednika parlamenata zemalja centralne i istočne Evrope koja je, u organizaciji poljskog Senata i Sejma, održana u Varšavi 17. i 18. maja 2017.

Prije početka Konferencije predsjedavajući su održali odvojene bilateralne susrete s predsjednicima Senata i Sejma Republike Poljske: predsjedavajući Doma naroda Bariša Čolak s predsjednikom Senata Stanislavom Karczewskim a predsjedavajući Predstavničkog doma Šefik Džaferović s predsjednikom Sejma Marekom Kuchinskim.

Predsjednik Senata je, nakon riječi dobrodošlice i zadovoljstva zbog dolaska delegacije Parlamentarne skupštine BiH na Konferenciju, istakao da postoje brojne mogućnosti za saradnju naših država te da je cilj ovog skupa razmjena iskustava i mišljenja, čime se posebno ukazuje na značaj parlamentarne demokratije. Također je rekao da je cilj Konferencije predsjednika parlamenata i jačanje odnosa zemalja članica EU s evropskim zemljama koje nisu članice EU. Naglasio je da EU prolazi kroz loš period, ne samo zbog Breksita, te da održavanjem Konferencije žele sagledati širu situaciju.

Predsjedavajući Doma naroda zahvalio se na pozivu za učešće na Konferenciji kao i na pozivu za bilateralni sastanak. Istakao je da su odnosi između Poljske i Bosne i Hercegovine u svemu prijateljski te da nema otvorenih pitanja. Također je rekao da možemo uraditi više kad su u pitanju ekonomski odnosi iako je turizam privredna grana u kojoj postoji dobra saradnja. Predsjedavajući je iskoristio priliku da pozove domaćina da posjeti Bosnu i Hercegovinu i podsjetio na planiranu posjetu predsjednika Poljske i predsjednika Sejma Bosni i Hercegovini. Na kraju, predsjedavajući Čolak zahvalio se na podršci koju Poljska pruža Bosni i Hercegovini na putu u EU.

Predsjednik Senata Stanislav Karczewski zahvalio se i odgovorio da prihvata poziv za posjetu Bosni i Hercegovini koju namjerava realizirati prije izbora 2018.godine.

Kao i predsjednik Senata, predsjednik Sejma rekao je da poljska strana želi jačati saradnju između zemalja članica EU sa zemljama koje to nisu, što je cilj Konferencije izražavajući nadu da će to učvrstiti parlamentarnu saradnju. Gosp. Kuchinski rekao je da se najjače zemlje EU ne zalažu za brzo proširenje te da je to pitanje za koje se mora naći rješenje i jedan od načina jeste jačanje saradnje unutar regije. Iz tog razloga Poljska će predložiti da održavanje konferencije predsjednika parlamenata zemalja srednje i istočne Evrope postane tradicija, te ostaje da se vidi da li će prijedlog biti prihvaćen.

U razgovoru s predsjednikom Sejma predsjedavajući Predstavničkog doma Šefik Džaferović zahvalio se na pozivu za učešće na Konferenciji kao i na prošlogodišnjem gostoprimstvu koje je rezultiralo živom bilateralnom saradnjom. Predsjedavajući je izrazio zadovoljstvo zbog posjete predsjednika Sejma Bosni i Hercegovini najavljene za septembar ove godine. Džaferović je istakao da je Bosni i Hercegovini evropski put prioritet i izrazio uvjerenje da niko nije protiv novih oblika jačanja saradnje u regionu. Smatra da je dobra ideja Poljske uspostavljanje think-tank organizacije u kojoj bi bili eksperti koje imenuju parlamenti, što bi doprinijelo realizaciji projekata i planova u mnogim oblastima, a naročito u pogledu infrastrukture.

Nakon bilateralnih susreta, predsjedavajući oba doma Parlamentarne skupštine BiH prisustvovali su prijemu koji je priredio predsjednik Republike Poljske Andrzej Duda.

Na Konferenciji predsjednika parlamenata koja se sastojala od dva panela predsjednici su imali priliku razmijeniti mišljenja o temama vezanim za ulogu parlamentarne diplomatije, sigurnosti u regiji, infrastrukturnoj povezanosti i vrijednostima koje povezuju regiju Centralne i Istočne Evrope.

Predsjedavajući Doma naroda Bariša Čolak obratio se prisutnima tokom prvog panela govoreći o ulozi državnih parlamenata u međunarodnoj politici. Predsjedavajući Čolak rekao je da sve regionalne organizacije i inicijative imaju svoju parlamentarnu dimenziju u sklopu koje poslanici i delegati, raspravljajući o konkretnim pitanjima, pomažu organima izvršne vlasti u njihovom radu. Istakao je da u rješavanju svih pitanja diplomatija ostaje ključni mehanizam koji će davati smjernice za djelovanje te da politički dogovor uvijek ima prednost u odnosu na sve druge opcije.

Istaknuo je kako je za Bosnu i Hercegovinu strateški cilj članstvo u zajednici evropskih naroda, te ujedno i jedan od prioriteta vanjske politike, u smislu čvrste opredijeljenosti za uključivanjem zemlje u savremene evropske, političke, sigurnosne i ekonomske integracijske tokove. Također je rekao da članstvo u EU podrazumijeva prevladavanje odnosa koji funkcioniraju prema postkonfliktnom obrascu, opterećenom brojnim komunikacijskim i političkim barijerama, a kako su ukupni odnosi u BiH izuzetno složeni, svaki iskorak ka EU za Bosnu i Hercegovinu ima specifičnu težinu.

Predsjedavajući Predstavničkog doma Šefik Džaferović obratio se skupu govoreći o saradnji u razvoju infrastrukture ose Sjever-Jug. Predsjedavajući je naveo da je ovaj vid regionalne saradnje jako bitan za sve države učesnice te da je Bosna i Hercegovina posebno zainteresirana za izgradnju cestovnog i željezničkog koridora 5c, kao i Jadransko-jonskog

cestovnog koridora, te regionalnog plinovoda. Izgradnja navedenih koridora bila bi dodatni podsticaj svim zemljama regiona u procesu pristupanja EU.

Dodao je da ništa manje nije značajan projekat jadransko-jonskog autoputa od Italije do Grčke, a povezivanjem s koridorom 5c bila bi stvorena dodatna veza južne sa centralnom i zapadnom Evropom. Na kraju izlaganja, predsjedavajući je rekao da je naša zemlja jako zainteresirana za jačanje veza sa susjedima i zemljama regiona te da je za svaki vid saradnje koji će dovesti do razvoja Bosne i Hercegovine i zemalja regiona.

Na marginama Konferencije predsjedavajući domova susreli su se s predsjednicima parlamenata Rumunije, Crne Gore, Hrvatske i Mađarske.

Tokom razgovora s predsjednikom Senata Rumunije obje strane istakle su da su stabilnost regiona, njen prosperitet i jaka demokratija važni za sve u regiji. Predsjednik Senata Rumunije rekao je da su spremni razmijeniti ne samo dobra nego i loša iskustva, kako bi naša zemlja izbjegla iste greške na svom putu u članstvo EU. Zahvaljujući se na ponuđenoj saradnji, predsjedavajući su istakli da će BiH istrajati na evropskom putu koji je naš strateški cilj.

U razgovoru s predsjednikom Skupštine Crne Gore Ivanom Brajovićem obje strane su ocijenile da dvije zemlje otvoreno i partnerski saraduju te da postoje brojne mogućnosti za njihovo daljnje unapređenje. Izrazili su zadovoljstvo odličnim bilateralnim odnosima i predstojećom posjetom predsjednika Brajovića Bosni i Hercegovini, planiranom za juli ove godine.

Predsjedavajući su razgovarali sa zamjenikom predsjednika Hrvatskog sabora Željkom Reinerom i ocijenili da su bilateralni susreti prilika da se učvrste politički odnosi koji su između dvije zemlje na visokom nivou. Reiner je naglasio da su prve posjete predsjednika države, predsjednika Parlamenta i premijera bile posjete Bosni i Hercegovini. Također je istakao da Hrvatska podržava stabilnu BiH i provođenje reformi na putu u članstvo EU koje će prije svega koristiti Bosni i Hercegovini. Zaključili su da, pored dobre privredne saradnje, ima još prostora za njeno unapređenje.

Predsjednik Parlamenta Mađarske Laslo Kover i predsjedavajući Doma naroda Bariša Čolak razgovarali su o odnosima BiH i Mađarske, kazavši kako nema otvorenih pitanja, te kako dvije zemlje, osim dobre saradnje veže i zajednička historija. Čolak se zahvalio na svemu što je Mađarska učinila za Bosnu i Hercegovinu na njenom integracijskom putu, naglasivši važnost Twinning projekta „Jačanje kapaciteta parlamenata u procesu evropskih integracija“ koji je realiziran uz pomoć Parlamenta Mađarske. Laszlo Kover zahvalio je na ukazanom povjerenju za realizaciju twinning projekta, izrazivši spremnost na nastavak razmjene iskustava u oblasti usvajanja evropskih standarda i približavanja procesu evropskih i euroatlantskih integracija. Kazao je kako je Mađarska fokusirana na stabilnost Jugoistočne Evrope, te se zalaže za jednakost svih članica EU kao i isti pristup prema onim zemljama koje još uvijek nisu punopravne članice. Konstatirani su također i dobri ekonomski odnosi, te izraženo uvjerenje u mogućnost njihovog intenziviranja. Na kraju susreta gosp. Kover

najavio je održavanje konferencije predsjednika parlamenata Jugoistočne Evrope, planirano za jesen ove godine.

Konferencija je završena davanjem izjava za medije predsjednika Sejma Mareka Kuchcinskog i predsjednika Senata Republike Poljske Stanislaw Karczewskog.

Izvještaj odobrio:

Predsjedavajući Predstavničkog doma
Parlamentarne skupštine BiH
Šefik Džaferović

Predsjedavajući Doma naroda
Parlamentarne skupštine BiH
Bariša Čolak

Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju Sekretarijata Parlamentarne skupštine BiH
- Komisiji za vanjske poslove Predstavničkog doma
- Komisija za vanjsku i trgovinsku politiku Doma naroda
- a/a